

共同經課 - 1 以賽亞書五章一節~七節

1 我 beh 爲 tiòh 我所親疼 ê 唱歌，是我所疼 ê 歌，論伊 ê 葡萄園。我所親疼 ê 有葡萄園；tī 真肥 ê 山頭。  
2 伊開墾 hit-ê 園，除去石頭，栽上等 ê 葡萄樹，tī 園內起一座樓，koh 掘酒窟 tī-hia，ng 望結好 ê 葡萄，無 phah 算結野葡萄。3 Lín khiā 起耶路撒冷 ê，kap 猶大人 ah，ta<sup>n</sup> 請 lín tī 我 kap 我 ê 葡萄園中，判斷 tiòh m-tiòh。  
4 我爲我 ê 葡萄園所做 ê 以外，iáu 有甚麼 thang 做 ah？我 ng 望結好 ê 葡萄，怎樣反 tng 結野葡萄 ah？5 Ta<sup>n</sup> 我 kā lín 講我 beh 對我 ê 葡萄園怎樣行；我 beh 拆去籬笆，hō伊受吞滅；拆毀圍牆，hō伊受 thún 踏。6 我 beh hō伊荒廢，無 koh 修整，無 koh 耨剷(thû-thoá<sup>n</sup>)；反 tng 發刺 á kap 蒺藜；我也 beh 命令雲無落雨 tī 伊 ê 頂面。7 因爲萬軍 ê 耶和華 ê 葡萄園就是以色列家；伊所歡喜 ê 樹就是猶大人；伊所 ng 望 ê 是公平，反 tng 有暴虐；所 ng 望 ê 是公義，反 tng 有叫冤枉。

共同經課 - 2 詩篇八十篇一節~二節，八節~十九節

1 A-sat ê 詩；交 hō樂官；調用「做干證 ê 百合花」。1) 以色列 ê 牧者 ah，chhoā 約瑟親像羊群 ê，求你 à<sup>n</sup> 耳孔聽；坐 tī ki-lō兵 ê 頂面 ê，求你發出你 ê 光。2 Tī í-hoat-liân、便雅憫、Má-ná-se ê 面前，展出你 ê 權能，來救阮。8 你 tùi 埃及徙一叢葡萄樹，趕出列邦，來栽伊，9 你 tī 伊 ê 頭前 pià<sup>n</sup> 空土地；伊 ê 根釘深，就生淚滿地。10 伊 ê 影遮密 chiah-ê 山，伊 ê 枝親像真好 ê 柏香樹。11 發出伊 ê 枝，伸到大海，伊 ê 藤 thoà<sup>n</sup> 到大河。12 你啥事拆毀伊 ê 籬笆，Chhut-chāi 一切過路 ê 人挽伊？13 樹林內出來 ê 山豬 躡躡伊，曠野 ê 走獸食伊。14 萬軍 ê 上帝 ah，求你 tò-tng；Tùi 天 à<sup>n</sup> 落看，照顧 chit 叢葡萄樹，15 保護你 chià<sup>n</sup> 手所栽 ê，Kap 你爲家己所堅固 ê 枝。16 伊已經受火燒，受刀剗；爲 tiòh 你 ê 面 ê 受氣，in 就滅無。17 願你 ê 手岸 tī 你 chià<sup>n</sup>-pêng ê 人，就是你爲家己所堅固 ê 人子。18 Án-ni，阮就無倒退離開你；求你 hō 阮得 tiòh 活，阮就 beh 求叫你 ê 名。19 萬軍 ê 上帝耶和華 ah，hō阮 tò-tng；Hō你 ê 面發出光，阮就得 tiòh 救。

共同經課 - 3 希伯來書十一章二十九節~十二章二節

29 Tùi 信，in 過紅海，親像行乾地；埃及人試行伊，就沉落去。30 Tùi 信，séh 耶利哥城歷過七日，城就倒壞。31 Tùi 信，娼妓 Lat-háp 用和平接納細作，所以無 kap m順 thàn ê 人 sa<sup>n</sup>-kap 滅無。32 我 beh koh 講甚麼 ah？beh 講基甸、Pa-lèk、參孫、Iâ-hut-tha；kap 大衛、撒母耳，以及 chiah-ê 先知，就時無夠額。33 Hiah-ê 人，tùi 信，thâi 贏 chiah-ê 國，行公義，得 tiòh 應允，nih 獅嘴，34 phah-hoa 火燄，閃避利刀，弱成做強，交戰勇猛，攻破外邦 ê 戰陣。35 有婦人人得 tiòh in ê 親人 tùi 死 koh 活；亦有人受酷毒 ê 刑罰，m願受贖；是 ài 得 tiòh khah 好 ê koh 活：36 koh 有人受戲弄、鞭 phah，以及鎖鏈、關監，chiah-ê 試：37 koh 有人受石頭 tím，鋸 á 鋸，受誘惑 ê 試，hō刀 thâi 死：穿綿羊、山羊 ê 皮，奔波 ták 所在，tú-tiòh sòng-hiong、患難、暴虐；38 有 ê tī 曠野，tī 山嶺，tī 石洞，tī 地穴，四界漂流；chiah-ê 人是世間 boē 堪得有 ê。39 In lóng 已經 tùi 信得 tiòh 干證，但是未 bat 得 tiòh 所應允 ê；40 因爲上帝 kā 咱事先備辦 koh-khah 好 ê 事，是 beh hō in，若無咱，就 boē 得 tiòh 完全。1 已經有做干證 ê 到 hiah-choē，親像雲圍咱，就 tiòh 放下 ták 號 ê 重擔，kap 快快纏絆咱 ê 罪，用吞忍來走所安排 tī 咱頭前 ê 路站，2 tiòh 注神看耶穌，就是做信 ê 源頭 kap chhià<sup>n</sup> 尾 ê。伊爲 tiòh 所安排 tī 伊頭前 ê 快樂，就無要緊凌辱，忍受十字架，ta<sup>n</sup> 坐 tī 上帝寶座 ê 大 pêng。

共同經課 - 4 路加福音十二章四十九節~五十六節

49 我來是 beh 用火 hiat tī 地裡；火若已經 tòh，我 iáu-kú ài 甚麼？50 我有應該受 ê 洗；hit-ê 洗 iáu-bē 成，我迫切到怎樣？51 Lín phah 算我來是 beh hō地上和平 mah？我 kā lín 講，m是，反 tng 是冤家。52 Ta<sup>n</sup> 了後一家五有人 beh 冤家，三個 kap 兩個冤家，兩個 kap 三個冤家。53 父 kap Kiá<sup>n</sup>，kiá<sup>n</sup> kap 父，老母 kap cha-bó-kiá<sup>n</sup>，cha-bó-kiá<sup>n</sup> kap 老母，ta-ke kap 伊 ê sim-pū，sim-pū kap ta-ke，in lóng beh 冤家。54 伊就 koh 對眾人講，Lín 看見雲 tùi 西勢起，lín 就講，Beh 落雨；果然有 án-ni；55 看見風 tùi 南勢吹來，lín 就講，Beh 燒熱；也有 án-ni。56 假好 ê 人 ah，天 kap 地 ê 形式 lín to 看會出，怎樣 boē 會看出 chit-ê 時 ah？